



25. maj 2011

UKA 2011/84

Inatsisartut suleriaasianni § 36 naapertorlugu apeqquteqaat pillugu oqallissutissatut una matumuuna saqqummiuppara:

Innuttaasut, Nunat Avannarliit oqaatsit pillugit isumaqatigiissutaannut ilanngunneqanngitsut, nunasinissamik suliffeqarsinnaanermillu akuersissummik tunisinnaaneri eqqarsaatigalugu, kalaallisut oqalussinnaanissaannik qanorlu oqalloritsiginissaannik pisortatigoortumik piomasqaateqarsinnaaneq pillugu apeqquteqaatitut oqallisigisassatut siunnersuut.

(Inatsisartunut ilaasortasoq Akitsinguaq Olsen, Siumut)

Tunngavilersuut:

Siumumi tunngaviusumik isumaavoq kikkulluunniit Kalaallit Nunaanni tikilluaqqusaassasut, naggueqarneq, suaiaassuseq, upperisaqarneq, atoqateqartarneq oqaaseqarnerlu apeqqutaatinnagit. Taamatut tunngaviusumik akaarinnineq aalajangiusimassallugu pingaartuuvoq.

Killutungaani aamma isumaliuutigisariaqarparput piffissanngunnginnersoq, inuiaqatigiinnut oqaatsitigut ileqqulersornikkullu akuliuutitsiniarneq iluaqussallutigu, innuttaasut kalaallisut oqalussinnaanngitsut asannittumik aalajangersimasumilli piomasaqarfigissallugit. Naluneqanngilaq inuit nunani avannarlerni naggueqateqanngitsut Kalaallit Nunaanni siunissaminnik pilersitsinissaminnik ujartuisut amerliartuinnarut. Aatsatassaqaarnermut tunngatillugu aatsitassarsiornermik uuliasiornermillu ingerlatseqatigiiffiit Kalaallit Nunaata iluani pisuussutissanik misissuiniarlutik atuiniarlutillu soqutiginnittut ukiuni kingullerni amerliartorput.

Aatsitassarsiornermik maannakkut suliniutaasut arlaqartut piviusunngortinneqassappata, allatut ajornartumik tamatuma malitsigisaanik inuit nunani avannarlerni naggueqartunit allaanerusut Nunatsinnut tikerassapput. Inuity tamakku ilaat qularnanngitsumik sivikinnerusumi Nunatsinni najugaqassapput, aatsitassarsiornermik suliniutit aallarftisarnerinut atatillugu, tamatumalu kingorna aallaqqillutik.

Kisianni sivilunerusoq isigalugu qularnanngitsumik allatut ajornartumik nunasisoqassaaq aatsitassanik suliffissuannngortussanik qulakkeerinnittussatut pisariaqartumik sulisuusussanik, tamassumalu isumarput malillugu piffissanngortippaa iliuserisassanik isumaliuuteqarnissaq, inuit taakku ungasinnerusoq isigalugu inuiaqatigiinnut kalaaliusunut akuliutsinnissaannik qulakkiiniartussanik.

Aallarniutigalugu Siumut isumaqarpoq, inunnut nunanit avannarlerneersuunngitsunut nunasisinnaanermut/suliffeqarsinnaanermut akuersissummik tunniussinermut atatillugu oqaatsinik piginnaaneqarnissamut Namminersorlutik Oqartussat tungaanninngaanit pisortatigoortumik piomasqaateqarsinnaanermut inatsisitigut tunngavisaqaarnersoq misissortariaqartoq.

Soorunami aamma tassunga atatillugu aningaasartuutaasinnaasut missilerneqartariaqarput aamma kalaallit oqaasiinik ilinniartitsisussanik pisariaqartitsineq misissorneqarluni.

Ungasinnerusoq isigalugu Siumut isumaqarpoq, sulisussanik avataanit tikisitsisinnaaneq nunat avannarliit oqaatsit pillugit isumaqatigiissutaannut attuumassuteqanngimmat, tulliuttuni tunngaviit malillugilluunniit inatsisiliortoqartariaqarpoq:

- Inuk kinaluunniit nunat avannarliit oqaatsit pillugit isumaqatigiissutaannut attuumassuteqanngitsaq, aamma Kalaallit Nunaanni nunasinissamik suliffeqarsinnaanermillu akuersissummik kissaateqartoq pisussaavoq ukiut pingasut ingerlanerini kallaallit oqaasiinik ilinniartitaassalluni aammalu tunngaviusumik kalaallit oqaasiinik piginnaaneqarnermik misilitsinnermi angusissalluni. Naammaginatutut isiginnineq aallaavigalugu pingasoriarluni misilitsittoqarsinnaasariaqassaaq. Misilitsinnermi angisunngippat inuk pineqartoq nunasinissamik suliffeqarsinnaanermillu akuersissummik tunineqarsinnaassanngilaq.
- Oqaatsinik misilitsinnermut atatillugu aammattaaq isumaliuutigisariaqassaaq, inuit Naalagaaffeqatigiit avataanneersut aammalu nunat avannarliit oqaatit pillugit isumaqatigiissutaanni pineqanngitsut Kalaallit Nunaanni ukiuni tallimani nunasinissamik suliffeqarnisamillu akuersissuteqareernerup kingorna kommuninut Inatsisartunullu qinersisarnerni taaseqataasalernissaat qulakkeerniarlugu inatsisiliornissaq tunngavissaqarnersoq.

Aatsitassalerinermik inuussutissarsiornerup Kalaallit Nunaata aningaasaqarnikkut namminersulerinnaanera oqaatsitigut ileqqulersuuteqarnikkullu ilanngullugu unamminartoqalersinnaanera tappiiffigisariaqanngilarput. Pingaartuuvoq tassunga tungasortaa apeqquteteqaatitut oqalliserineqarumi tikkuarneqartoq, siunissami aningaasaqarnikkut iluaqutaalersinnaasut nuannaarutiginerisigut takunngitsoorneqannginnissaat.